

Uunga siunnersuut: 2016-imi aasartinnagu Telepost A/S-imi piginnittuunermut periusissiamik ersarissumik Naalakkersuisut suliaqarnissaannik Inatsisartunut aalajangiiffigisassatut siunnersuut. Piginnittuunermut periusissiassami tele-p iluani namminersortunngorsaannissami pilersaarutit naatsorsuutiginninnerillu ersarissumik allanneqarsimassapput. Tamatuma saniatigut ingerlassanut Telepost A/S-mut toqqaannartumik imminut akilersinnaanngitsunut Telepost A/S-ip aningaasaliinissaanut qanoq naatsorsuutiginninnerit ersarissarneqarsimassapput, taakkununggalu səkabelip tallineqarnissaanut radiokædellu pitsanngorsarneqarnissaanut pisat ilaapput.

(Saqq.: Inatsisartunut ilaasortaq Kalistat Lund, Inuit Ataqtigiit)

Siunnersuutip aappassaaneerneqarneranut

Sanaartornermut ataatsimiititaliap

ISUMALIUTISSIISUTAA

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Anders Olsen, Siumut, Siulittaasoq
Inatsisartunut ilaasortaq Kalistat Lund, Inuit Ataqtigiit, Siulittaasup tullia
Inatsisartunut ilaasortaq Jens-Erik Kirkegaard, Siumut
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Justus Hansen, Demokraatit

UPA 2016-ip ingerlanerani 6. maj siullermeerereermermi Ataatsimiititaliap siunnersuut misissorpaa.

Siunnersuutip imaa siunertaalu

Siunnersuuteqarnikkut siunertarinearpoq aktiaatileqatigiiffimmi TelePost A/S-imi Namminersorlutik Oqartussat aktiaatai pillugit ersarissumik piginnittup periusissai pillugit Naalakkersuisut piumasaqarfiginissaat ilungersuutigineqassasoq. Tassunga aamma nalunaarasuartaateqarnermut aamma niuernermik ammaassinissamut pilersaarutitut atatillugu piginnittumit periusissiaq ilannguteqquneqarpoq.

Siunnersuutip Inatsisartuni siullermeerneqarnera

TelePost A/S-ip atuuffii pillugit ersarissunik sinaakkuteqartariaqarnera ataatsimut isigalugu isumaqatiginartinneqarpoq. Nuna tamakkerlugu attaveqaatit pitsaasuussasut aaqqissuullugaassasullu isumaqatiginartinneqarportaaq. Inuit Ataqtigiit allannguutissatut ima oqaasertalimmik saqqummiussippot: ” Telepost A/S namminersortunngorsarnagu inuiaqatigiit ingerlatseqatigiiffiutaattut ingerlaannassasoq”, tamannalu suliffeqarfimmi ammanerulersitsineq, namminersortunngorsaaneq il.il. pillugit oqallisingaatsiarnermik kinguneqarpoq.

Siullermeerinermi Inuit Ataqtigiit allannguutissatut siunnersuutaat

”Inatsisartut aalajangiiffigisassaattut siunnersuutigaarput naalakkersuisut peqquneqassasut Telepost A/S namminersortunngorsarnagu inuiaqatigiit ingerlatseqatigiiffiutaattut ingerlaannassasoq. Nunatsinni inuit nammaqatigiillutik pitsaanerpaamillu kiffartuunneqarlutik teknikkikkut attaveqaateqarnikkut siuarsarnissaat suliarineqassamat, nunaqarfiit illoqarfiillu inui atuinermi akitigut artukkernagit ineriartortinnissaat siuarsarnissaallu aningaasalersorsinnaajumallugit.”

Saaffiginnissutit

Suliffeqarfiup ingerlanneqarnera, siunertai il.il. pillugit ilisimatinneqarnissaq siunertaralugu ull. 2. maj TelePost A/S Ataatsimiititaliamit ataatsimeeqatigineqarpoq.

Paasissutissanik tigussaasunik pissarsiniarluni Nalunaarasuartaateqarnermi Aqutsisunik Ataatsimiititaliap aamma ataatsimeeqateqarnissani pilersaarutigisimagaluarpa. Ajoraluartumilli Inatsisartuni ataatsimiinnerit sivitsorneqarneri pissutigalugit ataatsimiinnissat taakku arlaleriarlutik kinguartinneqarput, naggataatigullu taamaatiinneqarlutik.

Paasissutissiilluni ataatsimiinneq

Ataatsimiititaliap siunnersuummik suliaqarnerminut atatillugu Ineqarnermut, Sanaartornermut Attaveqaatigiinnermullu Naalakkersuisumik paasissutissiinertalimmik ataatsimeeqateqarsimavoq. Naalakkersuisup oqaatigisassaanut tunngavissiap aamma Ataatsimiititaliap apeqqutaasa assilineri isumaliutissiissummut uunga tapiliunneqarput, takuuk **Ilanngussaq 1.**

Ataatsimiititaliap siunnersuummik suliaqarnera

Nalunaarasuartaateqarnikkut peqqussutip § 2-anut ammanerulersitsinermut ilitsersuutitaani qupperneri 2-mit 4-mut atuarneqarsinnaapput:

“Inatsisitigut tunngavigisaq

Nalunaarasuartaateqarneq pillugu Inatsisartut peqqussutaanni atuuttumi ilaatigut

erserpoq:

§ 1. Namminersornerullutik Oqartussat Kalaallit Nunaanni, Kalaallit Nunaannut aamma Kalaallit Nunaanniit nalunaarasuartaatitigut atassuteqarnermik neqerooruteqartartut, kiisalu Kalaallit Nunaanni nalunaarasuartaatitigut attaveqarnermut atortunik, pilersuisut atuisullu akornanni attaveqaatit naapiffiisa (nettermineringspunkt) akornanni imaluunniit illoqarfiit nunaqarfiillu akornanni aammalu nunanut allanut atortut elektroniskiusut atorlugit attaveqaqatigiinnissamik ajornarunnaarsitsisut sanaartornerini ingerlanneqarnerinilu kisermaassisuupput.

Nalunaarasuartaateqarnikkut peqqussummi § 1-imi kisermaassineq pillugu allassimasup aamma nalunaarsuartaateqarnikkut peqqussummi § 2-p nassatarisaanik ammanerulersitsinerup imminnut ataqatigiinnerat uaniippoq nalunaarsuartaateqarnikkut niuffaffiit ammanerulersinneqassasut, tassa § 2-mi allassimammat: ”Naalackersuisut kiffartuussinerit § 1, imm. 1-imi taaneqartut ammanerulersinneqarnissaat pillugu aalajangiisinnaapput”.

§ 2. Naalackersuisut kiffartuussinerit § 1, imm. 1-imi taaneqartut ammanerulersinneqarnissaat pillugu aalajangiisinnaapput.

Imm. 2. Imm. 1-imi nalunaarasuartaatitigut attaveqarnermut atortut, pilersuisut atuisullu akornanni attaveqaatit naapiffiisa (nettermineringspunkt) akornanni imaluunniit illoqarfiit nunaqarfiillu akornanni aammalu nunanut allanut atortut elektroniskiusut atorlugit attaveqaqatigiinnissamik ajornarunnaarsitsisut pineqanngillat.

Imm. 3. Naalackersuisut nalunaarasuartaatitigut attaveqarnermut imm. 2-mi taaneqartut ammanerulersinneqarnissaannik aalajangersinnaapput, tassani teknologi pineqartoq atortut ledningeqanngitsut atorlugit nuussisarneq aallaavigineqarpat, aammalu taamaallaat illoqarfiit imaluunniit nunaqarfiit ataasiakkaat iluanni atorneqartussatut naatsorsuussaappata. Ammanerulersitsinissaq aalajangiunneqarpat nalunaarasuartaateqarnermik aqutsisut (Telestyrelsen) pisuni immikkut ittuni teknologimi pineqartut atortut kabelillit atorlugit atuinissamut akuersissuteqarsinnaapput.

Imm. 4. Naalackersuisut nalunaarasuartaatitigut kiffartuussinerit aamma nalunaarasuartaatitigut attaveqaqatigiinnermut atortut, imm. 1 aamma 3 naapertorlugit ammanerulersinneqartut pillugit aalajangersaasinnaapput.

Kisermaassiffigisap ilaaniittut ammanerulernissaannut piunnaasaqatit immikkut ittut naammassineqariarpata Nalunaarsuartaateqarnikkut peqqussummi § 2-ani aalajangigaq atorneqarsinnaavoq.

Aallaavigineqarpoq nalunaarasuartaateqarnikkut sullissinerit tamanut ammaanneqarsinnaasut, kisianni nalunaarasuartaateqarnikkut attaveqaqatigiinnerup immikkoortui sorliit tamanut ammaanneqarsinnaaneri killeqarluni. Assersuutigalugu radiukkut attaveqarfiit uiguleriiaat, immap naqqatigut kabeli aamma illoqarfiit nunaqarfiillu iluini kabelikkut attaveqaatit tamanut ammaanneqarsinnaanngillat.

Taamaattumik attaveqaatit taakku ammanerulersinneqassappata inatsit allannngortittariaqassaaq.

Nalunaarasuartaateqarneq peqqussummi malillugu suna ammanerulersinneqarsinnaava?

Nalunaarasuartaateqarneq pillugu peqqussummi § 2, imm. 1-mi nalunaarasuartaateqarnikkut kiffartuussinerit ammanerulersinneqarsinnaanerannut tunngavissiisoqarpoq.

Imatut paasillugu nalunaarasuartaateqarnermik kiffartuussinerimi neqeroornerit ammanerulersinneqarsinnaapput, tassunga ilaalluni internetimik kiffartuussineq.

Nalunaarasuartaateqarneq pillugu peqqussummi § 2, imm. 3-mi illoqarfiit nunaqarfillu ataasiakkaat iluanni atortut kabelitaqanngitsut ammanerulersinneqarsinnaanerannut tunngavissiisoqarpoq.

Imatut paasillugu attaveqaatinik kabelitaqanngitsunik matumanilu illoqarfiit nunaqarfillu ataasiakkaat iluanni bredbånd-imik periarfissaqarluni niueruteqarnermi.

Nalunaarasuartaateqarneq pillugu peqqussummi § 2, imm. 1-mi aamma imm. 3-mi nalunaarasuartaateqarnikkut kiffartuussinerit Nalunaarasuartaateqarneq pillugu peqqussummi § 2, imm. 1-mi aamma § 2, imm. 3-mi attaveqaatit kabelitaqanngitsut imminnut ataqatigiittumik ataatsikkut periarfissiissutigineqarput, taamaaliornikkut kiffartuussinerimik neqerooruteqartoq illoqarfiit nunaqarfiilluunniit ataasiakkaat iluanni naleqartitanik amerlasuukkaartumik – aamma kabelitaqanngitsunik immikkuualuttunik niuernerni annertunerusumik nakkutilliisunngorsinnaalluni.

Internetimik kiffartuussinerit taamaallaat ammanerulersinniarneqarpata (§2, imm. 1), assersuutigalugu ingerlatsisup kiffartuussisinnaanissaminut attaveqaatinut tunngasut tamaasa akuersissutaatilimmit pisiarisariaqassavai.

Akerlinganilli attaveqaatit kabelitaqanngitsut taamaallaat ammanerulersinneqassappata (§2, imm. 3), ilanngunneqaranilu § 2, imm. 1 malillugu internetimik kiffartuussineq, taava internetimi kiffartuussineq apeqqutaatinnagu ingerlatsisup amerlasuukkaartumik nioqqtigisat taamaallaat tunisinnaassavai.

Nalunaarasuartaateqarneq pillugu peqqussummi § 2, imm. 1-mi aamma imm. 3-mi taamaalilluni aalajangersakkat taakku marlut atorlugit internetimik aamma ledningitaqanngitsumik kiffartuussinerit ammaassiffigineqarsinnaalerput, tassani siunertarineqarluni kiffartuussinerimik neqeroortoq naleqartitat amerlanerit ilaannik piginnittunngorsinnaatillugu, tunngaviussappullu § 2 malillugu piumasaqaatit, periutsit aamma killiliinerit, ilaatigullu illoqarfiit nunaqarfillu ataasiakkaat akornani kiffartuussinerimik neqeroortup attaveqaatinik pilersitsinissamut periarfissaqannginnera, kiisalu illoqarfiit nunaqarfiilluunniit ataasiakkaat iluanni attaveqaatit kabelitaqannginnissaat.

Nalunaarasuartaateqarneq pillugu peqqussummi § 2, imm. 1 aamma 3 malillugit taakku pillugit ammassinissamik periarfissaq atorniarlugu Naalakkersuisut 2009-mi aalajangiipput.

Nalunaarasuartaateqarneq pillugu peqqussummi § 2-mi tunngaviliunneqartoq tassaavoq, neqeroortitsisoq - kiffartuussinissamut neqerooruteqartoq - attaveqaatinik kabelitaqanngitsunik nammineerluni pilersitserusuttoq, kisiannili attaveqaatit kabelit, nalunaarasuartaatinik sakkortusaaviit il.il. nammineerluni piginagit, piginnittorli tassaasoq akuersissutaatilik amerlasuukkaartumik pigisalik.

Siunnersuutip aningaasatigut kingunissai.

Siunnersuutip tunngavilersuutitaani aalajangiiffigisassatut siunnersuutip piviusunngornerani aningaasatigut allaffissornikkullu kingunissai allaaserineqassasut Inatsisartut Suleriaasianni § 33, imm. 1-mi allassimavoq.

Ataatsimiititaliap paasivaa, tamanna naapertorlugu siunnersuutip piviusunngornerani aningaasatigut kingunissai tassani taaneqarsimasut, taamaalillunilu nalilerneqarluni piginnittumit periusissiap suliarineqarnera sulisup ukiup ¼-ianik sulisinneqarneranik naleqassasoq.

Tamanna tunngavigalugu allatut naliliinissamut Ataatsimiititaliaq pissutissaqanngilaq.

Naatsorsuutiginngisamilli siunnersuut pisortat aningaasiviinut aningaasartuutunik amerlanerusunik malitseqassappat, aningaasartuutit taakku aningaasaliissutaareersunit akilerneqartariaqassapput, tamannalu pissappat suliniutit allat annikilliliiffigineqarnerannik kinguneqartariaqassaaq.

Ataatsimiititaliap inassutai

Ataatsimiititaliami amerlanerussuteqartut Siumup Inuit Ataqatigiillu ilaasortaatitai siunnersuut pillugu ima oqaaseqassapput:

Ukiut kingulliit ingerlaneranni Namminersorlutik Oqartussat naalakkersuisoqarfii, aqutsisoqarfii aamma suliffeqarfii namminersortuni aamma siunnersortinit nukiit annertoqisut atorneqarsimapput, taamaattorli nalunaarasuartaateqarnermi niuerneq pillugu siunissami unammilligassanut nammaqatigiimmik inuiaqatigiinni inaarutaasumik aaqqiissuteqartoqarpassinnani.

Tamanna tunngavigalugu Ataatsimiititaliami amerlanerussuteqartut ilisimavaat, aningaasat milliuunerpassuit misissueqqissaarnernut il.il. atorneqareersimasut imminut akilersinnaanngisaannassasut naatsorsuutigineqartoq. Taamaalillutik amerlanerussuteqartut akissaajaatit taakku annaaneqarsimasutut isumaqarfigaat, misissuinernullu amerlanernut

aningaasanik amerlanerusunik akileraartartunit atuisunillu akilerneqartunik atuinissaq pissutissaqartinneqanngilaq.

Immikkoortunut allakkeriveqarnermut aamma nalunaarasuartaateqarnikkut oqarasuaatinut kabelitalinnut angallattakkanullu tunngassuteqartunut TelePost A/S-ip kisermaassisuunera Ataatsimiititaliami amerlanerussuteqartut pissusissamisoortutut nalilerpaat.

Kisermaassisoqassatillugu kisermaassineq oqarasuaatit kabelitalit angallattakkallu pineqartillugit namminersortunit ingerlanneqarani pisortanit pinissaa Ataatsimiititaliami amerlanerussuteqartut aalajangiusimavaat, taamaalillunilu kisermaassineq TelePost A/S-imit nanginneqassasoq.

Niuernermik ammaassinissamik suliap unitsinneqarnissaanik Ataatsimiititaliami amerlanerussuteqartut kissaateqarnerat ima isumaqanngilaq, Ataatsimiititaliami amerlanerussuteqartut isumaqartut TelePost A/S ineriartortitsinermik unitsitsissasoq, kisiannili kisermaassisutut akuersissuteqartutut pisussaaffilerneqassasoq. Taamaalillutik amerlanerussuteqartut isumaqarput, Naalakkersuisut piginnittutut tigussaasumik suliniuteqarnerminni, pineqartumi tapeeqatigiittarnermik paasiniaaneq aallartissagaat, kiisalu aaqqissuusaanikkut pisariillisaanermi periarfissat tigussaasut ersarissarneqassasut. Nalunaarasuartaateqarnikkut tunngassuteqartuni akit allanngoriartornerannut, aningaasalersuinermut aamma ineriartornermut anguniakkat pillugit nalunaarasuartaateqarnerup nammaqatigiimmik ineriartortinnissaa Naalakkersuisullu ersarissunik ilitersuusiornissaat amerlanerussuteqartut kissaatigaat.

Ataatsimiititaliami amerlanerussuteqartuit aammattaaq tusarniaanermi piffissaq eqqorlugu akissutituaq maluginiarsimavaat, taannalu nalunaarusiaq Copenhagen Economics-imit suliarineqarsimasoq "Samfundsøkonomisk konsekvensanalyse af en teleliberalisering i Grønland" pillugu Nalunaarasuartaateqarnermi Aqutsisoqarfimmit tusarniaataasimasumit saqqummiunneqarsimasoq. Taannattaaq ilaatigut ammanerulersitsinissamut tapersersuinissamut akerliliinissamulluunniit tunngavilersorluakkamik aalajangiinissamut piukkunnaateqartutut nalilerneqanngitsoq.

Amerlanerussuteqartut isumaqarluinnarputtaaq misissueqqissaarnerit allat pilernavianngitsut.

Tamanna tunngavigalugu Ataatsimiititaliami amerlanerussuteqartut tatigaat, kisermaassisuusaanermik akuersissut tunngavigalugu Kalaallit Nunaanni nalunaarasuartaateqarnikkut ineriartortitsinissaq aamma nammaqatigiinneq tunngavigalugu tigussaasumik piginnittunit aqutsineq pitsaanerpaamik tunngavissaqartoq.

Sanaartornermut ataatsimiititaliami amerlanerussuteqartunut pingaaruteqarluinnarpoq, nuna tamakkerlugu naammaginantumik pitsaassusilimmik nalunaarasuartaateqarnikkut

kiffartuunneqarnissamik nalinninnaasumillu akissarsiaqartumit akilerneqarsinnaasumik atuisut neqeroorfiginissaat.

Tamanna tunuliaqqutaralugu Ataatsimiititaliami amerlanerussuteqartut siuliani pineqartut allannguutissatut siunnersuummik ersarissaataasumik ima saqqummiussissapput:

”Nalunaarasuartaateqarneq pillugu peqqussummi § 2, imm. 1 malillugu nalunaarasuartaateqarnermik kiffartuussinermi oqarasuaatinik kabelitalinnik angallattakkanillu neqeroortarnermi niuernerit ammanerulersinneqarnissaannut unitsitsinissaq pillugu Naalackersuisut peqquneqarnissaannik aalajangiiffigisassatut siunnersuut.

Nalunaarasuartaateqarneq pillugu peqqussummi allanngortinnissaannut Naalackersuisut aamma misissuissapput siunnersuusiorsinnaallutillu, taamaalillutik nalunaarasuartaateqarnermik kiffartuussinermi oqarasuaatinik kabelitalinnik angallattakkanillu pilersuineq akuersissutaatilimmit ataatsimit aamma siunissami isumagineqarsinnaaqullugu. Suliaq tamanna UKA 2017-imi saqqummiunneqassaaq.”

Ataatsimiititaliami ikinnerussuteqartoq Demokratineersoq siunnersuut pillugu ima oqaaseqassaaq:

Inuiaqatigiinni aningaasaqarnikkut inerikkiartortoqarnissaa uagut politikerisut sulissutigissagipput pingaaruteqartoq ataatsimiititaliami ikinnerussuteqartut Demokraatit isumaqarput. Aningaasaqarnikkut inerikkiartorneq atugarissaarnerulernissamut aqqutissatuaavoq atussaasoq atugarissaarnerup suli pitsaanerulerneranik nassataqartussaq.

Nalunaarasuartaateqarneq pillugu peqqussummi § 2, imm. 1 malillugu kabelitalimmik angallattakkanillu oqarasuaateqarnermi nalunaarasuartaateqarnermik kiffartuussinerit pillugit neqeroortarnermi niuernerit ammanerulernissaannut suliaq unitsinniarlugu Ataatsimiititaliami amerlanerussuteqartut Naalackersuisut peqquniarpaat.

Tamatumunnga Ataatsimiititaliami amerlanerussuteqartut nammaqatigiimmik aqqiissuteqarnissaq tunngaviuliuppaat, taamaaliornikkut nuna tamakkerlugu naammaginatartilugu pitsaassusilimmik nalunaarasuartaateqarnikkut kiffartuunneqarnissamik nalinninnaasumillu akissarsiaqartumit akilerneqarsinnaasumik atuisut neqeroorfigineqarsinnaassammata.

Demokraatinit Ataatsimiititaliami amerlanerussuteqartunit allannguutissatut siunnersuut paatsuunganartilluinnarneqarpoq. Isumaqarpugut atuisut pilerisulersinniarlugit killeqanngitsunik unammilleqatigiilluni niuernerq nioqputinik pitsaanernik akikinnernillu tamanut kinguneqarumaassasoq. Tamanna tunngavigalugu nammaqatigiilluarnepaamik aaqqiineq tassaassaaq suliaqartut allat TelePost A/S-imik unammillersinnaanerannik ammaassinissaq. Nammaqatigiinninnerpaamik aaqqiineq tassaassaaq Ataatsimiititaliami amerlanerussuteqartut siunnersuutaattut maanna killiffiup attatiinnarneqarnissaa.

Taamatut tunngavilersuineq oqarasuaatinik angallattakkanik niuernermit inuiaqatigiinnut sunniutissat pillugit misissueqqissaarnermit maanna saqqummiunneqaqqammersumit ataatsimut isigalugu taperserneqarpoq, tassanilu tunngaviliunneqarpoq ammanerulersitsineq inuiaqatigiinnut 69-112 mio. kr.-nik sunniuteqarumaassasoq.

Ataatsimiititaliami amerlanerussuteqartut Telep oqarasuaatinik angallattakkanik tunisassiaasa akii nunarsuarmi qaffasinnerpaanut ilaasut attatiinnarneqarnissaannik kissaateqarnerat innuttaasunut akissakinnerpaanut nammaqatigiinninnginnertut Demokraatinit isigineqarpoq. Niuernerq ammarneqarpat tamanna akit apparnerannik innuttaasunullu tamanut tunisassiat pitsanngornerannik nassataqassasoq ilimanarluinnarpoq.

Tamatuma saniatigut aalajangiiffigisap matuma nukingiunneqarnissaa amerlanerussuteqartunit kissaatigineqarmat Demokraatinit paasiuminaatsinneqarpoq. Taamaalilluni paasissutissanik tigussaasunik pissarsiniarluni Nalunaarasuartaateqarnermi Aqutsisunik Ataatsimiititaliap aamma ataatsimeeqateqarnissani pilersaarutigisimagaluarpa. Ajoraluartumilli Inatsisartuni ataatsimiinnerit sivitsorneqarneri pissutigalugit ataatsimiinnissat taakku arlaleriarlutik kinguartinneqarput, naggataatigullu taamaatiinnarneqarlutik. Paasissutissanik kinaassusersiunngitsunik piviusunillu tunngaveqartunik Nalunaarasuartaateqarnermi Aqutsisunit pissarsinissaq ataatsimiititaliami amerlanerussuteqartunit soqutigineqanngilluinnarpasippoq, tamatumunngali taarsiullugu aalajangiiffigisassatut siunnersuutip saqqummiunneqartup paasissutissanik naammangitsunik tunngaveqarluni akuerineqarnissaa orniginartinneqarsorinarluni. Periuseq taamaattoq isornartoqarluinnarpoq pimoorussinerunanilu. Inatsisartut aalajangigassaat tamarmik paasissutissanik, ilisimasalik misilittakkanillu tunngaveqarluni aalajangiunneqartariaqarput.

Aalajangiiffigisassatut siunnersuutip 2016-imi ukiakkut ataatsimiinnissamut kinguartinneqarnissaa Demokraatit sakkortuumik kaammattuutigaat. Tamanna pitinnagu oqarasuartaateqarneq pillugu isumasioqatigiinnermik ingerlatseqqullugit Naalakkersuisut kaammattorneqarput, tamatumani ammanerulersitsineq aamma/imaluunniit niuernermit ammaaneq oqallisigineqassallutik. Isumasioqatigiinnermi tassani ingerlatsisut tamarmik isummaminnik takorluukkaminnullu saqqummiussinissaminnut periarfissinneqartariaqarput, tamatumalu kingorna nalunaarasuartaateqarnermik suliaasaqarfimmik tamarmiusumik


ineriartortitsillutik suliamik nangitsinerminni Naalakkersuisut taakku piumasaminnik atorsinnaassallugit.

Ataatsimiititaliami ikinnerussuteqartup siuliani pineqartup oqaaseqaat tamanna tunngavigalugu allannguutissatut siunnersuut aamma siunnersuutaqqaartog itigartinneqassasut inassutigaa.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.




Anders Olsen, Siulittaasoq



Kalistat Lund,
Siulittaasup tullia



Jens-Erik Kirkegaard



Justus Hansen



Ane Hansen